


# NÈNKU MÈSÙ ÀBÒ ÀKATÀBALA

## NÈ BÀÀKAMUJINGULULA

 Mu Èvànjeeliyò wa Luukà Munsantu, ne kubangila ku nshapità wa 24 ku makùmi àsàtù ne. . . mvensà wa 31, anyi nêngãmbè ne mmvensà wa 30 wa nshapità wa 24.

*Nènkù byàkenzeka ne, pàrwàye musòmbe naabò ku mèèsà, ne yèyè wàkangata dyàmpà, ne wàkadibènesha, ne wàkadibibula, ne wàkabàpèèshadi.*

*Nènkù mèsù àbò àkatàbala, ne bààkamujingulula; ne yèyè wàkajìmina ku mèsù kwabò.*

*Nènkù bààkambilangana muntu ne mukwènde ne: Myoyi yètù kayìvwakù yìlàkuka kapyà munda mwètù, pàrwàye wàkula neetù mu njila, ne pàtùkàngwidiyè mifundu apu anyi?*

2 Nènkù Mukalenge àsakidilèku dibènesha Dyèndè. Cyenabwalu cyànyì ncifwànyine kwikala, bu mémè mwà kuciinyika dilòòlò edi: *Nènkù Mèsù Àbò Àkatàbala Nè Bààkamujingulula*. Mpindyewu kùdi luuyà lukolè, kàdi ndi njinga bwà nùntwàlèku ne lutùlùlù ànu ne mwènù mwònsò, bwà katanci kakesè cyanàànà, nènkù nènteetèku bwà kulwijakaja. Kàdi mpindyewu tudi baswè bwà kutàngila ku Dìyì byà kakùyì tuseku to, Dìyì dyà Nzambi dilenga dyà dikèma. Nènkù tudi tulòmba ne Nzambi, mu mùshindù kampànda, àtùtàbàjèku mèsù dilòòlò edi.

3 Paasàkà yèyè ànu ditwà cyanga cyanàànà cyà bwalu bulonda bwà kale bütù bwenzèke, ne aci nkààyaaci, dībà adi's tudikù ne ndambù wa kabìngilà bwà kwela mpatà, tudi ne ndambù wa kabìngilà bwà kwelakù nkonko, bwalu ncifwànyine kushààla pa meeji a kaàyi tuseku a kwangata ànu dīyì cyanàànà. Ne bu Kilistò kàyi mufilekù milayi yàkafilàYe ayi to, dībà adi twètù pèètù, nùnkù katwèna ànu ne cileejì citùdì naaci eci to.

4 Kàdi Mukalenge wetù mubènèshìbwe wàkamba, pàcìvwàYe pa buloba apa ne: “Katanci kakesè, bàà pa buloba kabààkuMmòna kàbìdì to.” Mpindyewu mwakù awu *buloba*, wùdi wùfùmina ku “ndongolwelu wa maalu a pa buloba, bisàmbà byà pa buloba.” “Bàà pa buloba kabààkuMmòna kàbìdì to. Kàdi nwènù nenùMmònè, bwalu Nèngìikalè neenù, munda mwènù mene, too ne ku ndekeelu kwà buloba.” Mpindyewu, Mèyì awu mmalelèlè ànu mùdì dyònsò dyà ku makwàbò Mèyì atùdì bambè mu lumingu lujimà elu, a mu Bible awu, malelèlè ànu mùdì makwàbò Mèyì kanà ónsò a mu Bible. “Katanci kakesè, bàà pa buloba kabààkuMmòna kàbìdì to. Kabààkwikalakù ne mèsù àbò matàbeeja to.” Kùdi bantu

bàdi balela pa buloba, kakùyi ku diswa dyà Nzambì to, kàdi ku disungula dyàbò sungasunga dyà budìsu kabàyi baswè kuMwitabuuja to nànsha Yèyè mwimàne kaaba aka mene wàkula neenù dilòòlò edi. Mbyà dibungama bwà kwamba, kàdi Bible mmwambè ne: “Mbalediibwe pa buloba ebu, bwà dipiila edi,” Yudà, lwà ku mvensà mwi3 aku.

<sup>5</sup> Mpindyewu, kàdi bwènù nwènù, dilòòlò edi, bàdi bàlwa ne bìimana mu cibambalu cijimà emu abu, ne nupàta patapata mu kaacitanda kakesè kàà luuyà lukolè mùshindù ewu, kanwèna balwè ànu bwà kunùmònabò to. Nudi balwè mu kiipàcìlà kampànda. Nènku, bwà ku dyànyì dimòna, wèwè udi mulwè ne meeji matòòke a mwoyi wèbè, bwà lwendu lwà sheemàsheemà ne Nzambì, bwà kuumuka kaaba aka, dilòòlò edi, mwikàle muntu mwímpè kutàmba mùvwà pawàbwedi apu. Ki cìmvwà mèmè nsambila pàmvwà mbwela mu ciibi, dilòòlò edi ne: “Mukalenge, wàmvwijakù muntu mutàmbe bwímpè pàngàapàtukà, dilòòlò edi, kutàmba mùndì pàndì mbwela apa.” Mpindyewu, pàdiYe. . .

<sup>6</sup> Kumpàlà kwà diya Dyèndè, Yèyè wàkamba mèyì a mùshindù ewu aa. Wàkamba ne: “Èwu udi ungiitabuuja Mèmè. . .” Yone Munsantu, nshapità wa 14, mvensà wa 7. “Èwu udi ungiitabuuja Mèmè, byenzedi bìNdi ngenza ebi yèyè neàbyènzè pèndè; neènzè byàbùngì kutàmba ebi, bwalu Ndi nya ku Taatù Wányì. Ndi nya, ne Ngaalukila kàbìdì.”

<sup>7</sup> Mpindyewu netùjandulè byenzedi byàkenzàYe abi. Byenzedi byàkenzàYe? Yèyè kààkalàkakù mukana wàmba mùvwàYe muntu munène nànsha, Yèyè ùvwa ànu Muntu mudipwekeshi. Kàvwakù wàkula ne myakù kampàndà yà mitùmbùke to, Yèyè ùvwa wàkula ànu bu Muntu wetù wà pàtupù ewu. Ùvwa musòmbèle munkaci mwà bapèlè, “mikènge yìvwa ne meenà, ne nyuunyi yìvwa ne maswa, kàdi Yèyè kàvwakù ne mwaba wà kutèekaYè mutù to.” Ùvwa ne civwàlù ànu cìmwèpèlè, cìvwàbò baMupèeshe, “cìvwa ciluka eku ne eku, kaciyi ne mutelu to.”

<sup>8</sup> Ki bwà cinyi bàakacyèlela nshòòbò. Cìvwa mbwà cinyi? Bwalu bìvwa bikèngela bwà cipròfetà cyà Dipungila Dikùlukulu kukùmbanaci ne: “Bààkaabanyangana bìvwàlù Byànyì, bààkeela nshòòbò bwà cinkutu Cyànyì.” Pa nàнку kabàvwakù mwà kucikòsololwela pa mutelu to, bìvwa bikèngela bwà kucyèlelabò nshòòbò, ne cìvwa mbwà kuujabò cipròfetà cyà Dipungila Dikùlukulu aci.

<sup>9</sup> Kàdi netùmonè, mu katancì kakesè cyanàànà emu, cyàkenzàYe ncinyi? Ne mèmè ndi ngiitabuuja, dilòòlò edi ne, ki cìdì nzala yà wònsò wà ku myoyi yètù, kubangila ànu ku wa mutàmbe bukesè too ne ku mutàmbe bukùlumpè, dilòòlò edi, mbwà kumòna Yesù Kìlistò. Ki dijinga dyà wànyì mwoyi. Kàdi bìdì nàнку bwà cinyi? Twètù bambè ku Mifùndu. . .

<sup>10</sup> Bisanji bìdi bìbyàmba ne mutooyi mukolè leelù ewu, télévisions yidi yìbyèla mu ndongamu, manàyi mmambè, ne: “Yèyè kèna apa to, kàdi mMubiike ku lufù!”

<sup>11</sup> Èè, dîbà adi, pìikalàbi ne mMubiike ku lufù, Bible mmwambè, mu Ebèlù 13.8 ne: “Yèyè ùdi umwèumwè awu makèèlèlè, leelù, too ne kashidi.” Mpindyewu, mwaba wùdì bwalu ngwòwò ewu, nwènù balùmyànà. Anyì m’Bulelèlè, anyì kî m’Bulelèlè to. Ne, cyòci kaciyi Bulelèlè to, dîbà adi Bible ngwà mafi, ne dîbà adi Mèyi awu ngàà mafi; ne dîbà adi tudi bajimine, ne kakwèna dibìikà dyà bafwè to, ne twètù tudi ànu tudingidija bu bàdi bìitabuujà. Kàdi, pìikalàci Bulelèlè, dîbà adi’s bikèngela Cidishindikè Cyòci ciinè.

<sup>12</sup> Wèwè mwambè ne màyi aa ngàà àboleshangana, mèmè ncitukù mwanji kumòna màyi kacya kwònsò eku to, wèwè muàmpongòlwèle, ne òwò kaayi a àboleshangana to, dîbà adi màyi èbè wèwè—èbè wèwè’s ngàà mafi, kàdi wèwè muàmpongòlwèle, ne miikàle a àboleshangana, dîbà adi màyi èbè’s mmalelèlè.

<sup>13</sup> Pìikalà Kilistò umwèumwè awu makèèlèlè, leelù, too ne kashidi, nànkù’s Bible mmulelèlè. Yèyè kàyi umwèumwè awu makèèlèlè, leelù, too ne kashidi to, nànkù kî mMulelèlè to. Pìikalà Mèyi a Nzambì kaayi malelèlè to, nànkù Kilistò kî mmulelèlè to. Dîbà adi, pìikalà Mèyi a Nzambì kaayi malelèlè to, Nzambì kî mmulelèlè to. Kàdi, dîbà adi, pìikalà Dîyi dyà Nzambì dilelèlè, dîbà adi Bible mmulelèlè, Nzambì mmulelèlè, Kilistò mmulelèlè, nènku bìwwa bikèngela bwà twètù kwikala ne lulamatu ku Bwalu abu. Menemene!

<sup>14</sup> Mpindyewu, pàvwàYe pa buloba, Yèyè kàakalàkakù mukana wàmba mùvwàYe mwondopi munène kampànda nànsha. Mbanganyi bàdiku bamanyè ne Mwànà wa Nzambì kàakambakù mùvwàYe mwondopi? Cyà bushùwà menemene. Wàkamba ne: “Mèmè ncyèna mwà kwenza cintu nànsha cimwèpelè Mèmè mwinè to, ànu cîNdi mmòna Taatù wènza. Kî mMèmè udi wenza byenzedi to,” mwàkambàYe, “n”Taatu udi musòmbèle munda Mwànyì. Yèyè ngudi wenza byenzedi.” Mbyenzedi byà mùshindù kaayi byàkenzàYe?

<sup>15</sup> Tudi tusangana mu Bible, mwaba wùvwà muntu dînà dyèndè Filipò musùngidiibwe. Ki kuyayè kapeta mulundà wèndè, Natànaèlè, ntàntà mule, mu kilòmèètà makùmi ànaayi ne mwandamukùlù lwà paanyimà pàà mukunà. Ki kulwayè nendè kùdi Yesù. Kàdi pààkamusanganàye apu, ùvwà mwinshì mwà mucì, ùsambila. Ki yèyè kwamba ne: “Lwàku, ùmone Utùdi bapetè: Yesù wa ku Nazalèètà, mwànà wa Yòzefù.”

Yèyè kwamba ne: “Nkufwànyìnèkù kupàtuka cintu cìmpè mu Nazalèètà anyì?”

Yèyè ne: “Lwàku ùmonè.”

16 Ki cileeji cyà citàmbe bwîmpè cîndiku mémè mumanyè ncyôci aci. Kwàngacikù cidi muntu mukwàbò wàmba pa Bwalu abu to. Lwâku, ùdimwènè wêwè nkààyeèbè! Yèyè ne: “Lwâku ùmonè.”

17 Nènku pààkalwàye, Yesù ùvwa mwimàne mu mulongo, pàmwápa mwikàle ùsambidila bantu. Nènku pààkalwà Filipò, pàmwè ne Natànàèlà, Yesù wákamba ne: “Mónaayi mwena Izalèèlà, mwena munda mùdi kamùyi budimù!”

18 Awu ne: “Udi mummanyè díbà kaayi, Laabi?” Cyàkamukèmesha’s. “Udi Wèwè mummanyine kwèpi?”

19 Yèyè ne: “Kumpàlà kwà Filipò kukubiikilayè, paùvwa mwinsì mwà mucì apu, Mémè’s mvwa mukumòne.” Mu ntàntà wa kilòmèètà makùmi ànaayi ne mwandamukùlù, dyàmwàmwa dya mukùnà, nànsha nànkù: “Mvwa mukumòne.”

20 Aci’s cyàkaleeja ne Yèyè ùvwa Nganyì. Ùvwa Nzambì udi kwònsòkwònsò; kàyi ànu mupròfeta cyanààna to, kàdi Nzambì Yèyè mwinè mumwènèshìibwe mu mubidi. Ki bwà cinyì, Yèyè ùvwa mwà kuwütèeka panshi, mwoyi Wèndè, ne kuwàngata cyàkàbìdi.

21 Mukàji mukesè kampànda kupàtùkayè bwà kusuna màyi dîngà ditùkù. Ki kwakulaYè nendè, kwamba ne: “Mukàji, Ntwàdìlèkù màyi a kunwà!”

22 Awu ne: “Kacìtu cilèlè bwà nwènù beena Yudà bwà kutùlòmbe, twètù beena Sàmaalèyà, cintu bu nànkù to. Katùtu ne malanda pankaci pèètù to.”

23 Yèyè ne: “Kàdi bu wèwè mumanyè ne Nganyì ùdi wakula nendè ewu, wèwè’s nguvwa mwà kuNdòmbe Mémè màyi a kunwà. Nùnkù Mémè mvwa mwà kukutwàdila Màyi àudi kùyi ulwa apa bwà kusuna to.”

24 Ki awu ne: “Ciinà ncile, Mukalenge. Nyawù Kùyi ne cyà disuna naaci, kàdi kùdi Wèwè mufwànyine kupeta miinè Màyi awu ki kwèpi.”

25 CìvwaYe wènza aci ncinyì? Ùvwa ùlenga nyumà wendè. Ne pààkapetàYe cìvwa lutàtù lwèndè, lutàtù lwèndè lùvwa lwà ne yèyè ùvwa musòmbe mu masandi. Ùkaavwa ne balùme kí mbàngì kí mbàngì bàtaanu, kàdi musòmbe ne wendè mwisambòmbò.

Ki Yesù kumwambila ne: “Ndààku, wàngatè bàyeèbè, kàdi ùlwe mwab’ewu.”

Ki awu kwambayè ne: “Ncìtu ne bàyaanyi bwàlà.”

26 Yèyè ne: “To, ukàavwa naabò bàtaanu, ne ewu ùdi musòmbe nendè mpindyewu awu kí ngwebè nànsha. Pa nànkù, wambì bîmpè.”

27 Tàngilàayi mpindyewu, mwena Yudà awu. Pààkamwenzelà Yesù cishimà aci, mwena Yudà mulelèlà wa lulamatu lwà

menemene, mwena Yuda wa cyà bushùwà, mulelèlà awu, wàkamba ne: “Wèwè udi Mwàna wa Nzambi, Mfumù wa Izalèlèlà.” Úvwa mumanyè ne bimanyinu abi bìvwa ne cyà kufila Maasiyà awu.

<sup>28</sup> Nènku mpindyewu ki mwena Sàmaalèyà nyèyè ewu. Paakenjiibwà cishimà aci pa yèyè, wàkamba ne: “Mukalenge, ngàajingùlùlù ne Wèwè udi Mupròfetà. Twètù tudi bamanyè ne pàalwà Maasiyà awu, Yèyè ki watwàmbila maalu aa. Kàdi Wèwè udi Nganyi?”

Yèyè ne: “Mémè ki Yèyè udi wakulangana neebè ewu.”

<sup>29</sup> Kushiyayè dibùngù dyèndè dyà màyi, ne kuyayè mu cimenga lubilu, ne kwambayè ne: “Lwàyi, kanùmonàayi Muntu Udi mungambile bintu bìndi mwenzè. Ki m’Maasiyà mwinè ewu anyi?” Cyà bushùwà’s.

<sup>30</sup> Mu Mifundù mwònsò tudi bafwànyine kucyàngata, mùvwàYe cyà bushùwà mwenzè bintu bìvwa Taatù ùMuleeja. Bible mmwambè, mu Yone Munsantu ne, pàakaMwelàbo lukonko bwà cinyi Yèyè kàakondopa bikalàbà byònsò abi, kàdi Yèyè wàkamba ne: “Bulelèlà, bulelèlà, Ndi nnwàmbila.” Yone Munsantu 5.19: “Bulelèlà, bulelèlà, Ndi nnwàmbila ne, Mwàna kèna mwà kwenza cintu nànsha cimwè mu Yèyè mwinè to; kàdi cidìYe ùmòna Taatù wènza aci, Mwàna ùdi wènza cyòci cimwècimwè aci.”

<sup>31</sup> Mpindyewu, pìikalàbi ne Kilistò mmubiike ku bafwè, ne mwikàle munkaci mwètù leelù ewu, ne wàkalaya ne bintu bimwèbimwè byàkenzàYe abi, twètù pèètù tuvwa mwà kubyenza, anyi aci m’Bulelèlà, anyi kí m’Bulelèlà to. Bible mmwambè ne: “Yèyè ùdi umwèumwè awu makèlèlèlà, leelù, too ne kashidi.”

<sup>32</sup> Nènku, nwènù balundà bàanyi, ndi ànu ne disànkà dyà kumanya, leelù ewu ne, bulelèlà, ne byònsò bìdì munda mwànyi, ndi ngiitabuuja ne Yesù Kilistò ùdi Mwàna wa Nzambi. Wàkiimiciibwa ne kulediibwa, ku dilediibwa dyà kadiyi katobà. Wàkakènga pa Ponsiyo Pilaatù; kupoopediibwa pa nkùrusè, kufwà, kujiikiibwa, kubiika ku lufù mu ditùkù diisàtù; ne kubànda mu Dyulu, ne mmusòmbe ku dibòkò dyà balumè dyà Mutàmbe Bunène. Ne Nyumà Mwimpè ùdi kaaba aka ùtùngunuka ne mudimu wùmwèwùmwè wàkenzàYe pàvwàYe pànu pa buloba awu. Meeji bulenga kaayipu’s wè!

<sup>33</sup> Dindà dilenga kaayipu’s wè, dindà dyà dibiikà dyà ku lufù dyà kumpàlà, Paasàkà wa kumpàla ukààdikù kacya mucyè pa buloba! Nudikù nufika ku dimanya ne ewu Paasàkà utùdì tutwila cyanga, wa dibiikà Dyèndè dyà ku lufù ewu, ùdi ànu ùfunkuna cyanààna ku Paasàkà munène ucilwalwa, dîbà dyàlwàYe ùfùmina mu Maulu adi anyi? Ne bònsò bàdì bafwè mu Kilistò nebàbiikè ku lufù ne nebàye Nendè. Tudi ànu bindile cyòci aci, Paasàkà munène, ulwàlwa awu. Nènku, leelù ewu,

mùshindù mwinè wùdibi bilenga bilayà, ndisàmbiibwa kaayi, cijaadiki kaayipu citùdi naaci's wè, pàdi Bible ùcyàmbe patòòke, pàdi diikalakù Dyèndè dyà myaba yònsò dicyàmbe patòòke, pàdi Bukolè Bwèndè bwà dyondopa ùcyàmbe patòòke, pàdi Nyumà Wèndè munène ùcyàmbe patòòke, pàdi byònsò mu bufùki bicyàmbe patòòke, Èkèleeziyà Wèndè ùcyàmbe, mwoyi wànyì wùcyàmbe patòòke, mwoyi wà muntu yònsò udi mulediibwe cyàkàbìdì ewu wùcyàmbe, ne: "Yesù Kilistò ki Mwànà wa Nzambi, ne neálwe cyàkàbìdì! Ne Yèyè udi umwèmwè awu mpindyewu: 'Makèlèlèlè, leelù, too ne kashidi!'" Mpindyewu mònaayi.

<sup>34</sup> Mùvwa mmu dindà dilenga dyà Paasàkà edi. Kùvwa kwenzèke minungànyì yàbùngì, miyiiki. Bàmwè bakàjì bàvwa bafùme ku lukità, ne bàmba ne bàvwa bamòne cikèènà-kumòna cyà Banjèlo. Kàdi bàvwa bàcinka ne ùvwa mmulami wa mu lupangu; Màriyà, maamù, bwalu ùvwa muumvwè dīyì dyàkula paanyimà pèndè, dyàmbe ne: "Unùdì nukèba nganyì?" Ne pàkakùdimukàYè. . .

<sup>35</sup> Kukùdimukayè, e kwambayè ne: "Mbambùle Mukalenge wanyì bayè Nèndè. Ncyèna mumanyè kùdìbo baMulààdike to. PaWikalà mumanyè, ngambilèku kùdìYè, ne mèmè nènye kaMwangata."

KukùdimukaYè, e kwamba ne: "Màriyà."

<sup>36</sup> Ki kuMutàngilayè, ne kwambayè ne: "Laabòni," mbwena kwamba ne, "Mfùmwanì!"

<sup>37</sup> KwambaYè ne: "KùNdengì to, bwalu Ncyèna mwanjì kubànda to. Kàdi Nèmbandè ku Taatù webè, ne ku Taatù Wanyì, ku Nzambi Wanyì, ne ku Nzambi webè. Kàdi ndàaku, ùkambilè bayiidi Bàànyì ne Nènkawilàngànè naabò mu Ngàlèlè."

<sup>38</sup> Mùshindù mwinè wùvwàbi bimwèke bu bwalu bwà mafi, bwà Muntu mwena citàlù civwabò bamòne beelè manga a dibènga kubola ewu; ne mufwè, mujiikiibwe, ne edi dikaavwa nditùkù diinàyi, anyì ditùkù diisàtù dyà kacya Wàfwa. Peetèlò ùkaavwa mutekète ne mu mabòko, ne muswè bwà kuya kalòba. Bàbìdì bààbò bààkamba, umwe dìnà dyèndè Kelèòpà, kwambabò ne: "Netwàlùkilè ànu kwètù, ku Yelusàlèmà." Nènku bóbò mu njila, bènda bàya, mu dindà adi, pààkangatà Peetèlò nshinga wèndè wa ndòbo ne kwasa lwendu bwa kuyayè kalòba, bàbìdì aba bàvwa bènda bàya mu njila, babungàme. Nènku pàvwàbo bènda bàya mu njila apu, bàvwa bènda bàmba ne: "Èè, mèmè ndi ngeela meeji ne pànu kapàcyenà pàsaamina mwoyi to. Kaa, mùshindù mwinè wutùvwà biitabùùje ne Yèyè nguvwa Maasiyà awu's wè! Mmunyì mùvwàku Muntu awu, Uvwa ubiìsha bafwè awu, mwà kutwàla ne kulekela mwakwidi munène awu ùMwelulwila? Mmunyì mùvwàku Muntu awu, Uvwa mwà kumòna cikèènà-kumòna pa cikèènà-kumòna awu, mwà kulekela disàlaayi dyà beena Loomò adi diMuswika

mukùsù kwìsù, ne kuMutuuta ku mutù, ne kwamba ne: ‘Ní Udi mupròfetà, twámblèbi wáKutuutu awu?’ Mmunyi mùvwàYekù mwà kwela lubilà lukolè ùlòmba luse, pa nkùrusè, pààbì Yèyè mene mwà kubiisha bafwè?’ Kaa, cìvwa ncikondo cyà cìtekeshangana ne mu mabòko’s!

<sup>39</sup> Ne bikondo byà bitekeshangana mu mabòko abi’s bitu bivwila mwena kwitabuuja kanà yònsò ewu, bwa kukuteeta, ne kukupima, ne kumòna ní udi witabuuja cyà bushùwà. “Mwànà wa balùme yònsò udi ulwa kùdì Nzambi, ùdì ne cyà kwanji kuteeciibwa dyàmbedi, mulongèshiibwe bu mwànà.”

<sup>40</sup> Nekwikalè bàmwè bàà kunùdì kaaba aka dilòlò edi, kakùyì mpatà to, bààpìcilà ku diteeciibwa òmwèdimwè adi. Byòbì bikèngela bwà twètù kubiikila mulongo wa babèedi, ncyèna ne cingényingenyi cyà ne bàdì bapetè twartà twà disambila mbanganyi to, muntu mukwàbò nànsha umwe kí mmumanyè to; twònsò tùvwà ànu tucyòmpakaja, ne banùpèèshetù. Mémè nèmbiikidilè kuumukila mwaba kampànda, mwaba wònsò wùdì meeji àanyi pa diinè dìbà adi awu. Tudi mwà kutwàla ànu ndambù mukesè ku musangu. Makùmi àbìdì, pàmwàpa, nebàpìcilè mu mulongo wà disambila awu. Bònsò mbaswè kulwa. Wèwè udi mwà kwela meeji ne mMukupite wèwè, kàdì kí mMukupite nànsha. Ùdì ànu ùkuteeta cyanààna, bwà kumòna ànu wèwè ní wàMwitabuuja. Cikèèna-kumòna kacýèna cyòndopa to; cikèèna-kumòna cidi ànu cishindika Bwikadi Bwèndè cyanààna.

<sup>41</sup> Mvwa musòmbè ànu mwab’ewu cyanààna, mutàngile ànu mpindyewu mene mu batèeleji mwàmwa. Ne ndi mmòna mu—mulundà wanyi, Màndàmù Cox, wa ku Kentucky kwàka. Ùvwakù ne kànsèrè kanène mu mpàlà mwèndè, kùkaadi ndambù wa mbingu, kamudyè too ne mu nyungulukilu wa disù emu. Ùkaavwa ùpunga ne lufù. Màndàmù Wood, mulundà wanyi mwìmpè, kumbiikilayè ku tèlèfonè, ùdila mwadi, wàmba ne: “Ngeela meeji ne nekàdye disù dyà mààmù dyònsò, mu matùkù makèsè emu.” Ngàngàbukà kubangayè wàkàteetela eci wàkàteetela eci, ne bintu byà mùshindù kampànda, kàdì kukàtantalajayè’s. Bikaavwa mu mmwènekelu wa wènza bwòwà. Mémè kubwelamù e kwenza kaadisambila kàa kapeepèle, kakesè, ne diitabuuja dyà dylè lwongò ne, cìvwa mwà kwenzeka. Kàdì’s ki yèyè ewu musòmbè kaaba aka dilòlò edi, ànu mwèndè ne kale ne mubidi tumatuma; kí nkashiyè nànsha katobà to, kònsò nkondòpiibwe, mu mpàla mwèndè amu. Nyewù musòmbè ànu kaaba aka mene kumpàlà kwètù. Bàkwàbò myaba yònsò, biikàle ne cintu cìmwècìmwè aci. Bwà cinyi? Bwalu Yesù Kilistò mmubiike ku bafwè, ne Ùdì ne mwoyi.

<sup>42</sup> Yèyè umwèumwè uvwa mwà kulenga mwena nsudì, wàmba ne: “Ndi muswè, kezùdiibwà” awu, ùdì mwà kulenga kànsèrè kwamba ne: “Ndi muswè, kezùdiibwà,” piikalàbi ne Yèyè ùdì umwèumwè awu makèèlèlè, leelù, too ne kashidi.

43 Nènkù pàvwà Kelèòpà ne bakwàbò abu bènda bàya, batekète mu mabòko, bàvwa ànu bu mu òmòwè dyà ku maadindà a dibungama awu, bimwèke ànu bu ne maalu ònsò àvwa ènda kabèsa. Ki dyàkàmwè, Muntu kampànda ewu pwà, mùvwaYè mulòpòkela paanyimà pààbo, mukolèshe makàsà ne mubàpetè. Ne bòbò kabàvwa ànu bamanyè ne ùvwa m'Mukalenge Yesù to! Ùvwa ne mwoyi, kàdi bantu bààbùngì bàvwa baMunangè kabàvwa bacimanyè to.

44 Ne mbyà mwomùmwè ne mùdìbi leelù ewu. Kùdi bantu bààbùngì leelù ewu bàdì banangè Mukalenge, kàdi kabàyi bamanyè to. Udi mufwànyine kubàmbilaci, kàdi kabàyi mwà kujingululakù ne Yèyè ùdi ne mwoyi kashidi ne kashidi to, dilòlò edì ne, Yèyè ùdi kaaba aka mu èkèleeziyà emu dilòlò edì, ne Yèyè ùdi munkaci mwetù, ne neikalèmu too ne pààlwàYe mu mubidi wà musunya, mubidi wètù ewu. “Ncyàdyàkukushiyakù anyi kukulekela nànsa.”

45 Nènkù pàvwàbo bènda bàya apu ne kubangabò kuyiikila mu njila, Yesù, ndi muswè bwà nùmonè cintu cyà kumpalà cyakenzà Yesù, wàkaya buludì ku Mifundu, kwambaYè ne: “Kaa, beena myoyi mikùtākàne nwé, mbinùkolèle bwà kwitabuuja cyàkambà bapròfetà anyi?” Bwalu, Ùvwa ùfuma ku dibàkonka ne: “Cinùdi babungàmìne nùnkù ncinyi?”

46 Ki bòbò ne: “Wèwè ùdi ànu mwenyi anyi? Kwènàku Wèwè mumanyè ne Yesù wa mu Nazalèetà awu, Utùvwa beelè meeji ne ki Maasiya awu, Musùngidi wa Izalèlèlè, Wèwe kwèna mumanyè ne edì mene nditùkù diisàtù dyà kacya bààMupoopela pa nkùrusè anyi? Ne Yèyè's ùvwa muntu wa bukolè, mu Dìyi. Ùvwa Mupròfetà wa bukolè, bwalu kùvwa bishimà byàbùngì ne bikwàbò, bìdì Nzambì mwenzè Nendè. Ne edì nditùkù diisàtù; kàdi patùdì twakulangana apa mbaMushebèye, ne baMujiikè, ne Ùvwa ùsanganyiibwa mu lukità. Kàdi bàmwè bakàji mbalwè kutùdì batwàmbile ne mMubiike ku bafwè. Kàdi twètù tuvwa bamanyè ne bùvwa ànu bwalu bukùtākàne bukùtākàja, pa nànkù tukàadi mu njila twalukila's.”

47 Dìbà adi ki dyàkabangàYe kukàngula Dìyi. Kaa, ndi munangèpu Dìyi dyà Cyendèlèlèlè dyà Nzambì's wè! KubangaYè kwenda mu Mifundu dyàdyàdyà, ùbangila ku Mòsà. Kàakashiyakù kantu nànsa kàmwè kakàyi kabuulula to, Wàkaya buludì ku Dìyi!

48 Muntu kanà yònsò mutùma kùdì Nzambì, nànsa yèyè mwikàle nganyi, neàshaalè ne Dìyi dyà Nzambì. Kabìyi nànkù to, kì mmusadidi mulelèlè wa Nzambì to.

49 Wàkaya buludì ku Dìyi. Ne Yèyè wàkaleeja, ku Dìyi ne, bìvwa bikèngela bwà Kilistò àfwe, àbiikè ku lufù, ne àbwele mu Butùmbi Bwèndè. Mpindyewu, kaa, mùshindù mwinè wùvwàbo ne cyà kwikala bayiikile's wè!



50 Mémè mvw'a kujingakù kwikala mupetè kaamuyiki kakesè kàà ndambù wa mèbà Nendè aku (kàdi nwènù?) mu njila amu. Wèwè udi wamba ne: "Èè, Mwanètù Branham, ncyà bushùwà ne mvwa mufwànyine kukàjinga. Mvwa mufwànyine kukàjinga." Èè, s'tudi mwà kwikala naakù mpindyewu mene. S'n'Yèyè udi wakula neebè awu, mu mwoyi wèbè amu. Wèwè ngudi kùyi ànu ukàjingulula to.

51 Mpindyewu mònaayi pàkaavwàYe wènda ùseemena pabwìpi ne cimenga, dilòlò dikaavwa dyènda dilwa, Yèyè kwenza bu ne Úvwa ùtungunuka ne diya.

52 Yèyè's mmufwànyine kwenza ne wèwè pèèbè nànkù awu. M'Mufwànyine kukwelesha meeji ne neÀtungunukè ne diya, kàdi Kààkutungunuka ne diya to. Kaakutungunuka ne diya to. Yèyè mmuswè ànu bwà ùMubiikilè.

53 Ki kuMwambilabò ne: "Kaa, ditùkù's dikaadi diyè be. Mpindyewu Kùtungunukukù ne diya to, kàdi swàkù ùbwelè ne ùshaalè neetù." Wèwè Mupèèshè ànu dibìikila dyà mùshindù awu adi, ùjandulè cyènzekà. Bòbò ne: "Ditùkù dikaadi diyè bikolè mpindyewu, Lwàkù ùshaalè neetù. Tukàadi twipacila ku dilòlò." Ki Yèyè kukùdimuka e kubwela, mu kazùbù kakesè kàà didiila, mu kaacyalabeenyi kakesè.

Ku Mputù bàcidi ne twà nànkù. Udi udyà ne ulààla, ne byònsò mbifucila mu kabèjì kàmwè aku, ku cilààla-beenyi cyèbè aci.

54 Kàdi pààkabwelàYe naabò munda amu! Ki luseke lulenga ndwòlò elu. Mu ditùkù dijimà adi, pàvwàbo bàyiikila Nendè apu, Kààkambakù bwalu nànsha bùmwe to. Kàdi pààbì, bòbò's bàvwa bendè Nendè ne bayiikile Nendè, kumpàla, kàdi kabàyi bàcìjingulula to.

55 Nganyi uvwa mukwepùle ku dyenza dyà njìwù ayi ditùkù adi awu? Nganyi uvwa mwenzè ne mwànà wa mu dibòko awu ùmvwe bìmpè? Nganyi uvwa mukufucile musinga wà byàkudyà abi awu? S'ùvwa n'Yèyè, kàdi wèwè nguvwa kùyi ànu mucìjingulùle to. Nganyi udi mukupèeshe bukolè bwà mubidi bwà wèwè kupàtuka kulwa mu èkèleeziyà dilòlò edi awu? S'n'Yèyè, kàdi wèwè ngudi kuyi ucìjingulula to. Kaa, twìkalakù mwà kwenza bu bòbò's wè, ànu kuMubiikila cyanààna bwà kubwela!

56 Nènku pààkabwelàYe, kubwela munda amu, kukàngabò biibi, díbà adi ki kwenzaYè cintu kampàndà cìvwàkù muntu mukwàbò yònsò nànshà umwe kàyi mwà kucyèenza mùshindù awu to. Yèyè nguvwa Umwèpelè uvwa mwà kucyèenza, bwalu bòbò bàkaavwakù Nendè kumpàla kwà dipoopediibwa Dyèndè pa nkùrusè. Nènku Wàkàngata dyàmpà adi, ne, ànu mwàkacyènzàYe amu, ki wùvwà mùshindù Wèndè Sungasunga wà dicyèenza. Ki mèsù àbò kutàbalawù, ne kujingululabò ne ùvwa mwà kwikala ànu Yèyè. Kàakanènga naabò ntàntà mule

menemene to. KujìminaYè ku mèsù kwàbò, mu katanci kakesè cyanààna. [Mwanèètu Branham ùdi ùtuuta cishòndò—Muf.]

57 Nènku mu njila amu, bààkaalukila ànu ne lùkàsà lwònsò pàvwàbò bàya apu, ne makàsà mapeepèle, bènda bèèla ànu mbilà yà bucimunyi, bwà kuya kabàmbila ne: “Mukalenge mmubiike ku lufù cyà bushùwà!” Kabàvwa bàalukila bwà kakòkangana pa ntèndeleeleu wabò to. Kabàvwa bàalukila bwà kakòkangana pa Cyòci to. Kàdi bàakajingulula ànu ne Yèyè ùvwa mubiike ku bafwè!

58 Mpindyewu, balundà bàanyi, piikalàbi ne Yesù Kilistò, Mwànà udi ne mwoyi wa Nzambi awu, paanyimà pàà bidimu cinunu ne nkàmà citèemà, piikalàbi ne Bible mmulelèlè, Yèyè mmwambè ne: “Mémè ndi ne mwoyi bwà kashidi ne kashidi,” Yèyè ùdi ne mwoyi kaaba aka, mu citanda emu dilòòlò edi, ànu muvwàYe ditùkù dyà dibìikà Dyèndè dyà ku lufù adi amu, Ùdi ànu mu mubidi cyanààna.

59 Bàmwè bàà kùdìbo bàvwa badisangishe. Kàdi Yèyè wàkapičila buludì mu bimanu, e kumwènèka munda amu, munkaci mwàbò amu, kwamba ne: “Mònaayi, Ndengàayi. Tàngilàayi bibangu Byanyi byà mpùtá mu byanzà Byanyi emu. Nyumà ùtu ne misunya ne mifùbà mùNdi naabi emu anyi?” Yèyè ne: “Mpèèshaayi cintu kampàndà cyà kudyà.” Ki kuMupèèshabò mushipa ne dyàmpà. Ki kwimanaYè mwaba awu e kubìdyaYè, kumpàlà kwàbò, kwamba ne: “Nyumà kàtu ùdya munùdi nuMmòna Mémè ndyà emu to.”

60 Yèyè ùdi cinyi? Yèyè ùdi Yehowàh Nzambi munène, udi ne mwoyi udi munkaci mwètù dilòòlò edi awu. Yèyè ùdi munkaci mwà bàdìdì bónsò anyi bàsàtù bàdì badisangishe: “Mémè nèngìkalè munkaci mwàbò.”

61 Nènku mpindyewu cìndì mémè ngeela meeji ncyòci eci. Piikalà Kilistò mwà kulwa kùdì bateèleji aba, panùdi nukòpakana apa, bindile, ne kujaadika, mu Paasàkà ewu ne, Yèyè ùdi ne mwoyi, ne mwimàne mu citanda emu dilòòlò edi, dìbà adi udi ne bukenji bwà kuMulòmba cintu kanà cyònsò cyàkafwilàYe aci, ne witabuuja ne neùcipetè. Nudi nwitabuuja ne aci m’Bulelèlè anyi? Ncyà bushùwà, mmwòmò.

62 Mpindyewu, ndi mufwànyine kwakula neenù ntàntà mule, kàdi Díyì òmwèpelè dyà kùdì Kilistò nedìikalè ne musinga kutàmba mèyi ónsò àndì mémè mufwànyine kwamba awu; mucyòke ne ndubakana mu díyì, ne muzengèle mùdìbi mu díyì amu.

63 Ne pashìishe cikwàbò cintu, mu dyakula. Mbikolè, bwalu mùneemu mmwètù, bwà kwenza disangisha dyà dítuuta dyàkalenga ne dilaabiibwa dyà Nyumà mùshindù awu. Bwà cinyi? Bwalu mùneemu mmwètù. Yesù wàkamba ne: “Mupròfetà, mwabò sungasunga, mu ditungà dyàbò sungasunga, nànsha mu

musòkò wàbò mene.” Cìdì ànu cintu kampàndà cìdì cyènzekà mùshindù awu cyanààna.

64 Bààkamba pààkayàYe Kwàbò Sungasunga, bààkamba ne: “Ewu kí mmwàna wa mukoonyi wa mabaya awu anyi? Mamw’Èndè, Màriyà, kèna neetù muneemu emu anyi? Bàna Bààbò bàà balùme ne bàna Bààbò bàà bakàjì bònsò, kabèena kaaba aka anyi? Katwènakù babàmanyè anyi? Mmu cilongelu kaayi mùdìYekù mupàtùkile? Mmu sèminère kaayi mùdìYekù mupetèle dipòlomè? Mmikàndà kaayi yà dijaadikiibwa naayi yìdìYekù mwambùle?” Kàdi Yèyè kàvwakù mupicìle mu cilongelu anyi sèminère kampànda, anyi mikàndà kaayi yà dijaadikiibwa naayi to, kàdi Úvwa mufùmìne kùdì Nzambì. Kàdi bóbò kabàvwa mwà kucimònakù to. Bààkamba ne: “Nkwèpi kùdìYe mupetèle elu lungènyi?”

65 Ne pààkaMumònàbo ùjingulula meeji a bantu, pààkalwà Peetèlò kùdìYe, Wàkamba ne: “Dìna dyèbè n’Simonà, dìna dyà tatwèbè n’Yona,” cyàkabàpapula. Mmunyi mùdìYe mubàmanyè?

66 Bàfaalèsà bàvwa biimàne mwaba awu, ne kwambabò ne: “Yèyè m’Beelèzèbùlà. Yèyè mmfùmù wa beena mbùkù. Ndémon!”

67 Kàdi Yesù wàkamba ne: “Nudi nuNgamba Mémè, Mwàna wa muntu, dìyi dìbi adi, nebànùfwilèdi luse. Kàdi pààlwà Nyumà Mwimpè kwenza cintu cimwècimwè eci, nwènu bambè dìyi dìbi òmùwè bwà Cyòci aci, kacyakunùfwidiibwakù luse to, nànsha mu eci cikondo anyi mu cikondo cìcilwalwà.” Pa nànkù, ncintu cyà njìwù. Pa nànkù mmunyi mwàkamanyàYe? Wàkamba nànkù bwà cinyi? Úvwa mumanyè ne bimanyinu abi bìvwa mwà kujika too ne ku ditùkù dyà ndekeelu edi.

68 Nènkù matùkù a ndekeelu aa, Yèyè kàvwa anu mufwànyìne kwikala mwakàne to, bwà kupòngolola ciiji Cyèndè cicolè aci pa cisàmbà cyakàne nànsha. Bóbò bàdi...Tudi bapimiibwe mu cipiminu, basangànyìibwe katùyi ne bujitu to. Cyònsò citùdì twètù twelela meeji cìdì ànu bikondo byà dicyonkomoka, ndongamu yà ku tudyòmà, kayìyi mikenketa to, Elvis Presley, Arthur Godfrey, minèkù yà kale yà bundù, bantu bàà luumù bàà ku tudyòmà ne ku télévision. Tudi tushààla kumbèlu dilòòlò dyà mu diisàtù, tupùmùbisha mu disangisha dyà milòmbò, bwà kubandila bintu byà budingidingi bu byòbì abi, kàdi tudibiikila mutùdì beena Kilistò?

69 Pashiishe pàdì Nzambì ùpòngolola Nyumà Wendè, ne ùleeja bimanyinu byà dibìlkà Dyèndè dyà ku lufù, tudì tuCìpiissha kàdi tukùdimuka tuya. Nènkù aci’s mmpèkaatu udi kàyi mwà kufwidiibwa luse, kwenza nànkù awu. Yesù wàkamba ne: “Kwamba dìyi dìbi òmùwèpelè bwà Cyòci aci, kacyakufwidiibwakù luse to, nànsha mu eci cikondo anyi mu cikondo cìcilwalwà.” Pa nànkù bidì bìkèngela bwà Nyumà awu

àlwe mu matùkù a ndekeelu aa, bwà kujaadika ne Díyì dyà Nzambi adi ndilelèlà.

<sup>70</sup> Nènkù ndi ngamba, ku bukòokeshi bwà Díyì dyà Nzambi, ne ku dyumvwa dyà musùùkà wànyì mèmè mwinè ne: Nyumà Mwímpè umwèumwè awu (Nyumà) ùdi kaaba aka mene munkaci mwà cisàmbà eci. Mpindyewu, ngàmbì ne Yèyè mmubiike ku bafwè. Ngàmbì ne Yèyè ùdi ne mwoyi, ne mwoyi kashidi ne bwà kashidi ne kashidi. Ngàmbì ne Yèyè ùdi umwèumwè awu makèèlèlà, leelù, too ne kashidi; umwèumwè awu mu mèyì mamba, umwèumwè awu mu Bukolè; umwèumwè awu mu byònsò, byònsò pa kuumusha mubidi Wèndè wà musunya wùdi musòmbe ku dyàbalumè dyà Nzambi ne Mutàmbe bunènè awu, mu Butùmbi. Kàdi Nyumà Mwímpè ngudi kaaba aka, ùkwàta mudimu, ùtwa eku ùtwa eku, wènza bintu, wènza menemene ànu mwàkenzà Yesù Kilistò amu, bwalu ncileeji cyà dibìikà Dyèndè dyà ku lufù. Díbà kaayi bulengadi's wè! Mpindyewu ndi ngeela meeji ne nudi bamòne mwaba wùndi mwimànyine.

<sup>71</sup> Mpindyewu, kî ng'ànu ne bantu bakesè, bàà bìipacila ku lukàmà, anyì nkàmà yìbìdi kaaba aka mu—mu kaacitanda kakesè aka aba, bapàte patapata munda emu dilòlò edi to, kàdi nkàadi mwambambe díyì adi kumpàlà kwà binunu kuvudija ku binunu, ne nkàmà yà binunu, mukwàte Bible mu cyanza cimwè, ne Koran mu cikwàbò, ngamba ne, “umwe ngwa cyà bushùwà ne mukwàbò ngwa mafi,” ne ngeela mwakwidi yònsò wa ba-Müzùlùmanyi kadyòmbò bwà kulwayè kujaadika, anyì nî mmukwàbò kanà yònsò, mwena Bouddah, anyì yònsò uvwayè mufwànyine kwikala awu, ku Koran, ne ku ntèndeleeleu wèndè, kàdi bònsò bàtu bàshààla ànu matàma bu byàtá.

<sup>72</sup> Kàdi, bàna bèètù, cìntù ngenzela nànkù awu, mbwalu ndi mumanyè ne Mupikudi wanyì ùdi ne mwoyi! Ne Yèyè ùdi Bulelèlà. Yesù Kilistò ùdi ne mwoyi. Ùdi kaaba aka!

<sup>73</sup> Mpindyewu kakwèna cintu nànsha cimwè mu mèmè mwinè cìndiku mufwànyine kwenza to, ndipà dyà kùdi Nzambi. “Udi ucyènza bìshi's?” Cìdi ànu kudilekelela cyanàànà.

<sup>74</sup> Ànu mu citanda emu mpindyewu mùdi Banjèlò bààbùngì, bààbùngì menemene. Wèwè udi wamba ne: “Aci m'Mufundu anyi?” S'm'Bible. Indilà nkuleejè. Mbanganyì bàdi beena Kilistò mwab'ewu? Elàayi byanza muulu. Èyo, nudi mwà kubipwekeshaayi. Bible mmwambè ne: “Banjèlò bàà Nzambi mbaasè citùùdilù cinyùngùlùkile aba bàdi bàMucìina.” Nànkù, kùdi Banjèlò mwab'ewu!

<sup>75</sup> Pashìishe Kilistò mmwambè ne: “Mwaba wònsò wùdi bàbìdi anyì bàsàtù badisangishe mu Dìna Dyànyì, Mèmè nèngìikalè munkaci mwàbò.” Nànkù, Yèyè ùdi mwab'ewu! Cintu cimwèpelè cìdìku ncyà ne, kanwèna mwà kuMumòna to, kàdi ku diitabuuja nkutùdi tucìitabuuja.

<sup>76</sup> Mèmè ndi mwà kunùjaadikila ne cisanjì cidi kàbìdi munkaci mwà kupìcila kaaba aka, mèyì's. Ndi mwà kunùjaadikila ne bindidìmbi bìdi munkaci mwà kupìcila kaaba aka. Kabyàkulenga mulonda ewu to; kabyàkulonda eci eci, lumwènù elu to, ku cikòlokolo eci; anyi kabyàkufika ku kapese kàà cyamù aka to, bwalu kabivwa byenza mùshindù awu nànsha. Kàdi kùdi kapese kàà cyamù kààpàtulà cindidìmbi aci.

<sup>77</sup> Kàdi Nzambi mmutèèke bàmwè mu Èkèleeziyà, dyàmbedi bàpostòlò, pashiishe bapròfetà, balongeshi, batangadiki, ne bampaasàtá, bònso abu bwà dipwàngaja dyà Èkèleeziyà. Mmunyi mutùdiku mwà kudyombola umwe, ne kwamba ne mukwàbò awu kèna nànkù? Nzambi ngudi ucyènza, Yèyè mwinè. Kì ncingà cintu to ànu kudilekelela wèwè mwinè kùdi Nyumà Mwímpè. Nènku Nyumà Mwímpè ùdi wàngacila apu, nènku wèwè kwèna umanya cyùdi wenza to. Mmudimu mudishikàmìne wà Nyumà Mwímpè.

<sup>78</sup> Mpindyewu, balundà bàànyì, nwènù beena mu cimenga cyètù. Ne ndi muswè kwamba nùnkù mpindyewu, kumpàlà kwà kujikija ditàbuluja edi. Dìmwè dya ku matùkù aa kakwàkushààla nànsha kaabutù mu Jeffersonville to, kakààkushààla mu Charlestown to, kakààkushààla mu Louisville to. Buloba ebu bùkaadi bubobè bwà cilumbulwidi. Bàkaadi bapetè patùdì twakulangana apa bômbè bwà hydrogène bùdì Russie mwà kutùmina kuumukila mu Moscou, kubùmacishila mu Mùsèèsù Mwinâyì, ne kwangata cyònsò cyà ku byapù byà lupwishi mu myaba yònsò eyi, kàdi kucijika mu buloba too ne mu mètres makùmi àbìdì ne àsàtù, ne bômbè bùmwèpelè. Bômbè bùmwèpelè; mu ntàntà wa kilomètres carrés makùmi àsàtù ne mwandamukulù, nebùbwelè too ne mu mètres makùmi ànaayi ne itaanu mu buloba. Cyanza cidi pa ndènde. Ntankù ki kutuutayè eku. Dìbà dikaadi diyè kutàmba munùdi nwènù nwela meeji amu. Bwà cinyi kwindila too ne pa dìbà adi?

<sup>79</sup> Vùlukààyi ne: “Ntèntà wa buloba ewu yèyè munyangùke, tudi ne mukwàbò ukàadi mwindile.” Kùkwàcìkìkù bwòwà bwà maabômbè a hydrogène awu anyi cintu cikwàbò nànsha cimwè to. Bu mùdìbi ne wèwè udi ne Kilistò munda mwà mwoyi wèbè, ki kazùbù kàà disokomena ma-bômbè kàà katàmbe bwímpè kàndiku mèmè mumanyè nkòkò aku. Nkenza ne masàlà a nyuunyi; mwinshì mwà mapwàpwà Èndè amu, ki mùdì wèwè musòmbèle. Pa nànkù kùlubakanyi bwà bintu abi nànsha, pawikalà mwena Kilistò.

<sup>80</sup> Kàdi pawikalà kùyì mwena Kilistò to, ncyà bushùwà ne udi mwimànyìne mu mwaba mubì be. Kwèna mumanyè ne mmu kasunsa kaayi mwikalà mwoyi wèbè mwà kulekela dituuta to. Bible mmwambè ne bantu nebàfwe mu matùkù a ndekeelu, bàfwa disaamà dyà mwoyi: “Myoyi yà bantu balùme neyìmanè, bwòwà, dipampakana dyà bikondo, dikènga munkaci mwà matùnga.” Tàngilààyi mùdìbi bitàmbe, misangu dikùmi yà búngi

bwà bantu balùmè bààfwà, kutàmba bakàji; kacya Bible kàtukù mwambè ne myoyi yà bakàji neyìimanè to mMwambè ne: “Myoyi yà bantu balùmè neyìimanè.” Ncyà kaciyi dyela mpatà to, mu cyòci menemene.

<sup>81</sup> Ditùkù adi mu Oakland, mèmè ne mukàjàànyì tuvwa tusanganyibwa mu San Francisco mwàmwa, dikanka dinènè dyà buloba adi kwenzekadi. Ki buloba kubangabù kubyola's ne kushikunkila mwaba awu, mu mùshindù wà ne nzùbu yàkatènkakana, ne mimbùndà yà mîshì yitùuka yimata. Mabùlù manènè a lupeepèlè àkabànda muulu mùshindù ewu, ne mîshimù, anyì mishilà, cyònsò civwàku aci, bifùma mu myaba yònsò ayi. Ki bantu mu mbilu batàngile mu misèèsù, bèèla mbilà mikolè. Mèmè kudyàmbidila ne: “Neciikalè cinyi pààmwènèkà Mukalenge cyà bushùwà?” Binwinù byà maalà a cicyampa, bitungùnùke ànu kutungunuka, bàtèèka cicyampa cyàbò aci, bàcyàluja mu bitàmbà, ne bàcisùmbisha. Bantu bàbwela bwà kucisùmba. Muntu awu kàvwa mufwànyine kucisùmbisha bu muntu kàyi ùcisùmba to. Ncyà bushùwà.

<sup>82</sup> Bidi ne, twètù mbàdi bapùile. Lekèlà nkwambilè, mwanèètù wa balùmè. Mèmè ndi mwena Àmèrikè, ne ntu munangè ditungà dyànyì. Kàdi ditungà dyà kale edi mbadipimè mu cipiminu, ne disangànyibwe kadìyi bujitu to. Didi ditùkina mu màyi, cyà bushùwà ànu mùdibi ne ndi mwambi paanyima pàà cibùmbà cyà ku cyambilu eci dilòlò edi. Mpindyewu ndi ngamba nànkù bwà kulengeleela Nzambi. Ndi ncyàmba bwalu Nzambi mmucitèèke pa mwoyi wànyì bwà mèmè kucyàmba. Ne cintu cidì citàmbe bwimpè cyà wèwè kwenza nkudilongolola ku Dilwa dyà Mukalenge.

<sup>83</sup> Mpindyewu Mwitàbùùje, ikalà ne diitabuuja kùdiYe. Mpindyewu, mèyi ónsò àndi mèmè mufwànyine kwamba, ndi ngamba cyàkàbidi ne, kì mmawànyine kwamba cintu nànsha cimwè to pa kufwànyikija ne cidì Yesù mufwànyine kwamba. Kàdi nudikù bamanyè mwaba wùndi mwimàne, ne kasùmbù kàà bantu aka dilòlò edi anyi? Anyi ndi mukòsòlòle bibi, muumvùje bibi cintu kampànda, anyi ndi mwambè Bulelèlè. Mpindyewu piikalàbi ne Yesù Kilistò mmubiike ku bafwè, ne, mulayè ne, bintu bimwèbimwè byàkenzàYe abi twètù tuvwa mwà kubyenza pèètù, ne mèmè ntu mwambè, kacya pàncivwà mwànà mukesè wa mu dibòko . . .

<sup>84</sup> Ncivwa nànsha ne ngondo dikùmi ne mwandamukùlù to, ngeela meeji, kàdi ncivwa ne bidimu bipite pa bibidi to, nànsha bishi, pàngàakamònà cikèènà-kumònà cyànyì cyà nzànzànzà aci. Byòbi abi, bitu, nkacya bàndela. Bantu bàà mu tabernacle emu, mbamanyè nànkù. Bwà pàndi mwaba ewu apa, musangu nànsha wùmwè kacya kacitukù cyanjì kupangila to. Ne kacyakupangilakù to, bwalu n'Nzambi. Nciyè pa buloba bujimà, ditàbuluja dinène diteemè. Ne patùdi twakulangana apa, ku ngàsà wa Nzambi, ndi mu mùliyò wànyì mwibidi wà

misùùkà, ànu mu masangisha àànyì sungasunga, yíndì mpetela Mukalenge Yesù. Mùliyò mwibìdì, ncyà bushùwà's. Kàdì anjì elààyibì ànu meeji bwà mikwàbò miliyò yikaadi mipàtùke, Oral Roberts, tuntòlantòlà twònsò tùdì tuteemène ku cintu aci atu, ne tutùngùnùke, binunu kuvudija ku binunu, mu mùshindù wà ne pa buloba bujimà kùkaadi ditàbuluja dinènè dyà Bukolè bwà Nzambì, bùkwàta mudimu. Kàdì dyabùlù ùdì ùlekelela bintu byà mafi byà mishindù yònsò, bwà kuCilwisha. Kàdì Dìyì dyà cyà bushùwà, dilelèlè dyà Nzambi nediyè buludì too ne ku ndekeelu. Dyòdì kadyàkupangilakù to! "Mémè Mukalenge ngudi mucikùne. Mémè ngwacimyamina màyì muunya ne bufùku, bwà muntu kàlu kucinyènga mu cyanza Cyànyì to."

<sup>85</sup> Mpindyewu, dilòlò edi, ngàmbì ne Kilistò mmubiike ku bafwè. Yèyè ùdì umwèumwè awu makèèlèlè, leelù, too ne kashidi. Mpindyewu, Mukalenge ànùbènèshè. Yèyè mwenzè nànkù, díbà adì nudi. . . Nwènù bacitàbùùje, Nzambi ànùbènèshè. NùMulòmbaayi, díbà adì, pàamataYe mu cyalu. Kilistò Yèyè mumwènèke kaaba aka pa cibùmbà cyà ku cyambilu eci! Ki kadyòmbò nkòkò aka. Yesù Kilistò, Mwànà wa Nzambì, Yèyè mumwènèke mwab'ewu mene pa cibùmbà cyà ku cyambilu apa, ne mwenzè bintu bimwèbimwè byàkenzàYe pàvwàYe pa buloba apa abi, nenùMwitàbùùjè anyi?

<sup>86</sup> Mutàngilaayi, mu njila wa ku Èmawùsè, mùvwà nsongàalùmè ayi, mucibùle. . . PàakacibulàYe dyàmpà adì, Wàkenza cintu kampànda mwab'awu cìvwà mukwàbò muntu nansha umwe kàyì mwà kwenzakù to. Cìvwà ncintu cìvwà ànu Kilistò nkààyendè mwà kwenza. Ne bòbò bàakacijingulula.

<sup>87</sup> Mpindyewu bu Yèyè mwà kwenza cintu cìmwècìmwè aci mwab'ewu, cìdì ànu Kilistò nkààyendè mwà kwenza; kaciyi cintu kampànda cyà mashimi to, kàdì cintu ànu cyòcì cìmwècìmwè cyàkenzàYe aci; díbà adì's nudi nuMwitabuuja, nuMwakidila, nwikala ne diitabuuja mu Yèyè, nuMunanga, nuMusadila.

<sup>88</sup> Lekèlaayi nnwàmbilè, mpindyewu kùkadivwijiku ànu wa mu èkèleeziyà cyanààna to. Aci kaciyàkukùmbanakù to. Bikèngela ùlediibwè cyàkàbìdì. Kaciyi cintu cikwàtakaja cyà disaluka to; kaciyi kaacintu kakesè kampànda kaùdì mwambè ne: "Èè, mémè's ntu mwelè mbila. Ntu mwakùle mu myakulu. Ntu mwenzè *bikampànda*," kí ng'aci to. Pùikalàbì bulelèlè ne munda mwà mwoyi wèbè amu, Cintu kampànda cyòcì cilwè bwà kukushintulula, ne ulwa cifùkiibwà cipyacipyà mu Kilistò Yesù; wèwè mwakidile Mupèsonà awu, Kilistò Yesù; pàdì bintu bikùlakàjì bifwa, ne bintu bipyabìpyà bilediibwe cyàkàbìdì; wèwè wenza maalù mu mùshindù mujaalàme ne, byùvwà mwenzè bibì abi; wèwè unanga beena lukunà bèèbè, usambidila aba bàdì bàkudyombolà; apu kaayì ki paùdì mwena Kilistò. Muci wùtu wùmanyikila ku mamuma àdìwu wùkwàma.

<sup>89</sup> Mukalenge ànùbènèshèku mpindyewu, patùdì twinyika mitù yètù apa. Nèndombè mwanèètù wa bakàji bwà àye ku pyànò, ìmbè bitùùlùbitùùlù: “Ngàngàbukà Munène Ùkaadi Pabwìpì Mpindyewu, Yesù Muumvwidyanganyi Wa Luse.” Ne nwènù bàdì pambèlu, mpindyewu, bàdì ne twartà twà disambila abu, seemènaayaaku pabwìpì ne ciibi, netùbangè ànu mu katanci kakesè emu. Tùsambilàayi.

<sup>90</sup> Taatù wetù wa mu Dyulu mubènèshìibwe. Kaa, ne díyì dyànyì dipàte edi, ngondo yìnaayi yà dyakula, ndi ànu mucyòke be mu díyì dyànyì. Kàdi ndi ndòmba bwà Ùnkwàcìshèku mpindyewu. Mwab’ewu nekwikalè dikwàbò díbwe dyà mpelu mu Branham Tabernacle. Mwab’ewu nekùjuukè mu kwàbò ntèmù mu matùkù a ndekeelu, ku Ditùkù dyà Cilumbulwidi. Bààbùngì mbiimàne kuulu munda ne pambèlu, dilòlò edi, bààbùngì bàà kùdìbò bàdìkonka, bààbùngì bàdyàmbidila ne: “Mmafì, anyì mbulelèlèlè’s?”

<sup>91</sup> Éyì Taatù wa Cyendèlèlèlè ne Mubènèshìibwe, tudi tulòmba bwà Ùmwèneshèku dinanga Dyèbè kutùdì, mu kumwènèka kwà mwab’ewu ne kuvwija kwà Díyì Dyèbè dilelèlè. Nyewù ngàkùlù bwà Díyì Dyèbè, muWàkenzelà, Wèwè mwinè, Kelèòpà ne mulundà wendè, batàngile ku Èmawùsè. Ne twètù mu wetù njila, Mukalenge, patùdì mu lwendu apa, Akùlàku neetù ku Díyì Dyèbè. Ne mpindyewu lwàku munkacì mwètù! Éyì Kilistò Munène, lwàku munkacì mwètù, jaadikàku ne Mèyì Èbè mmalèlèlè, ne mwèneshàku Diikalakù Dyèbè mwab’ewu dilòlò edi. Patùdì twètù, bifùkùibwà bikwàte ne byà luse kabiyi bikùmbànyine tutonda ne tudi bangènzàmpèkàatù ne katùyì bakùmbànyine bintu ebi apa, kàdi tudi túbìitabuuja, Mukalenge. Ne ku ngàsà tudi tucìitaba, ku diitabuuja ne, tudi basungidìibwe, ne bàna Bèèbè. Tùbènèshèku mpindyewu, Mukalenge.

<sup>92</sup> Ndi mumanyè ne Díyì Dyèbè ndilelèlè, paWàkambà bwà “mupròfetà mu cimenga cyàbò sungasunga, munkacì mwà bàna bààbò sungasunga.” Kàdi, Mukalenge, ndi ndòmba, ànu bwà dilòlò edi ne, neWinyikè ànu mèsù cyanàànà pa bantu aba, ne kuDìmwènèsha cyàkàbìdì musangu ewu mùneemu mu cimenga eci, ku dikwàtà dyà mudimu dyà Nyumà Mwìmpè. Éyì Nzambì wa Cyendèlèlèlè, tùbènèshèku mpindyewu patùdì baKwindile apa. Ne enzàku bintu biWàkenzà kumpàlà kwà dipoopediibwa Dyèbè dyà ku nkùrusè abi, nènku Jeffersonville kààkwikalakù ne kantu nànsha kakesè kàà kudyàbakeena to. Kàdi, tudi bamanyè ne bòbò kabààkwikala ne kabingilà mu Ditùkù adi to, bwà ne Udi muDìmwènèshe. Mu Dìna dyà Yesù, mmùndì ndòmba emu. Amen.

<sup>93</sup> [Katùpà kàà mukàbà wà mèyì munda mutupù—Muf.] . . .kì ncidì mukàji ewu muswè bwà nsambidilè to. To, kì nkànsèrè aku to, bwalu yèyè wòndòpìibù ku kòkò aku. Kadi mmuswè bwà nsambilè bwà disaamà dyà nyimà didiye naadi. Ncyà bushùwà.



Ndutàtù mu nyimà wendè. Ncyà bushùwà anyi? Mpindyewu nudi nwitabuuja ne Yèyè mmubiike ku bafwè anyi? Mpindyewu tàngilàayi. Mémè muyiikile kàbidì nendè ànu ndambù, pàmwàpa cikwàbò cintu necyàmbiibwè. Ncyèna mumanyè to. Mpindyewu, mémè ncivwa ne cingènyingenyi nànsha cikesè cyà lutàtù lwèbè to. Ncyèna mumanyè mpindyewu ne civwa ncinyi to. Nwamònu anyi? Kàdi bisanji bikwàci byà mikàbà yà mèyi mbicikwàte, nudi mwà kujandula cidiYe mwambè.

<sup>94</sup> Twànji tùyiikilèku ànu kàbidì ndambù, bwà kumòna ní Wàngambilakù cikwàbò cintu. Ndi mmòna muntu mukàji udi ne mmwènekèlu wa cintu kampànda bu. . . Mmukàji wa cyanààna, ne yèyè udi ùmusambidila. Ne udi ùsanganyiibwa mu bulongolodi anyi lùpitàadi lwà mùshindù kampànda, cidi bu. . . mmwaba wà bapàle. Mmu Madison, mu Indiana. Mm—mm—mm—mmwanèènu wa bakàji kampànda ùdi uringila disambila, udi mu lùpitàadi kampànda. Nènkù wèwè mwitabùuje ne mwoyi webe wònsò, ne byònsò bìdì munda mwèbè, Nzambì neàkusungilè ne neàkwondòpè nyimà wèbè awu ne neàkusàngàjè. Udi ucitabuuja mpindyewu anyi? Èyo, lwàku kùneeku.

<sup>95</sup> Taatù wa mu Dyulu munanga, tudi tulòmba mu Dìna dyà Yesù Kilistò ne, Wòndopèku mukàji ewu, ne ùmusàngàjè. Nènkù mupèèshèku dibènesha edi. Ne ndi ndòmba bwà lusè lwà Nzambì lùshaalèku pambidi pèndè, ùmwondòpè, ne ùDyàngàcilè butumbi. Ndi ndòmba mu Dìna dyà Yesù Kilistò. Amen.

<sup>96</sup> Ndi mufwànyine kwamba nùnkù ewu. Kùdi dikankakana difùmina kwàka, difùmina buludì paanyimà *apa*. Indilà kakesè, shààla mwimàne mwab'awu katanci kakesè cyanààna. Ngàmònu Bukènkè abu bùkuumuka. Kùdi bantu bapitèpìte bùngì, bapitèpìte bùngì bankùngwile kaaba aka. Bantu bònsò bàdi bàkòka. Kàdi nyawù nCimòna citàngile kùdì aku. Mmuntu kampànda udi. . . Wèwè udi—udi ne disaamà dyà bânà bakàji dyàkupandàbo kumpàla eku. Ncyà bushùwà. Ndi mmòna kùpàtuka bantu bàbìdì anyi bàsàtù, ne Bukènkè butwè paanyimà pààpa ne bulengè muntu udi mwimàne paanyimà pààpa wàwa. Yèyè ngudi usambila bwà cyòci aci. Nwamònu anyi? Ncyà bushùwà. Nènkù cyùdì naaci, ndisaamà dyà inàbànza udibò bàpanda disaamà dyà bânà bakàji awu. Ncyà bushùwà. Mpindyewu ndàaku ùpetè dyondopiibwa dyèbè, ne Mukalenge Nzambì wàkusàngaji. Amen.

<sup>97</sup> Udikù mwà kulwa anyi? Wèwè inàbànza, udi witabuuja Mukalenge Yesù anyi? [Mwanèètù wa bakàji awu udi wàmba ne: “Eyowà's, mukalenge.”—Muf.] Udi witabuuja ne Yèyè mmubiike ku bafwè anyi? Mpindyewu, bwà kukumanya, ncyèna mukumanyè to. Ndi mufwànyine kwikala mukumòne pìikalàbi ne udi wa lwà mùneemu emu. Ncyèna mumanyè to. Bantu bàlwalwa ne bùumuka bàya, ncyèna mutàmbe kwikala mu

nyùngulukilu wa tabernacle emu bwà mêmè kumanya to. Kàdi, wèwè, udi wa mu cimenga emu anyi? [*“Èyowà.”*] Udi wa mu cimenga emu. Èyo, díbà adi, kàdi mêmè ncyèna mukumanyè to. Kàdi Kilistò mmukumanyè bulelèlè. Kàdi bu Yèyè mwà kunsokolwela, mwimàne mwab’ewu, cyùdi muvwilè kaaba aka, neùcitàbùùjè ne ùcitàbè anyi? Ne udi mumanyè ne mêmè ncyèna mumanyè cyùdi muvwilè kaaba aka to, ncyènakù ne cingènyingenyi to. Cintu cimwèpelè, wèwè udikù mufwànyine kwikala mummwène lwà mu cimenga emu, anyi cintu kampànda, anyi—anyì cintu kampànda. Ncyèna mumanyè to. Aci ncitàngile Nzambì bwà—bwà kumanya aci.

<sup>98</sup> Lwà paanyimà pààpa, udi muswè kwondopiibwa disaamà dyà mala dyùdi naadi adi anyi? Udi witabuujà ne Mukalenge Yesù neàkusàngàjè anyi? Wèwè mwitabùùje nànkù, udi mwà kucipeta.

<sup>99</sup> Mukwàbò ùdi ne dibadika dibì dyà mashi, udi musòmbe paanyimà pààpa wàwa, ngàmònu bàmwangata. Udi witabuujà ne Mukalenge neàkusàngàjè anyi? Èyo. Udi witabuujà ne mwoyi wèbè wònsò anyi? Nènkù udi mwà kupeta dyondopiibwa dyèbè, Nzambì wàkwondòpù ànu piinè apu. Uwàlengi n’Yèyè. Kí mmêmè ùdi mulengè awu to, wèwè nyawù udi mu ntàntà wa mètres citèemà kule naanyi. Amen.

<sup>100</sup> Mpindyewu nudi nwitabuujà ne Yèyè mmubiishùbwe ku bafwè anyi? Tàngilàayi anu cyanààna, ne ikàlaayi ne mwoyi, mpindyewu pàcidi mulongo wènda wùtentemuka apa. Kaa, mbikolè be muneemu mu Jeffersonville! Nwamònu anyi? Ne musumbà bu ewu mukunyùngùlùkile wèwè yònsò, bantu bònsò! Yesù wàkawkàta muntu ku cyaanza, ne kumulombola pambèlù pàà cimenga, musangu kampànda.

<sup>101</sup> Mpindyewu tangilà mu nùnkù, mwanèètù wa bakàji, katanci kakesè cyanààna. Itàbuùùjà ne Mukalenge Yesù ùdi kaaba aka bwà kukukwàcisha. Udi usaama lutàtù lùdi mu ntwàdijilu wa njila wa bunyawù, ne ngàngàbukà kampànda mmukukenkète. Ne kukwambilayè ne civwa nsundu. Ndi kàbidì nkumòna uteeta kukòsolola mu nzùbu, ne mwikàle wenda uya bitekètebitekète menemene. Udi ne binyòkà. Aci ng’EMU MMÙDÌ MUKALENGÈ WÀMBA. Ngàngabukà mmwambè ne bàdi ne cyà kukupandabi. Aci ncyà bushùwà menemene. Ne ngààmumònu wèlè cyàlè pa kartà kakesè aku ku bìrò byèndè ne: Rebekah Baker, 509 Mùsèèsù wà Graham. Ncyà bushùwà menemene. Amu mmu bìrò byèndè, pa mfiishì. Ncyà bushùwà. Udi witabuujà anyi? [Mwanèètù wa bakàji awu ùdi wàmba ne: *“Èyowà’s, mukalenge.”*—Muf.] Nànkù udi mwà kupeta dyondopiibwa dyèbè. Mu Dìnà dyà Mukalenge Yesù Kilistò, swàku bwà mukàji ewu àpetè dyondopiibwa dyèndè. Amen. Nzambì àkubènèshè, inàbànzà. Ndàaku, mwikàle mpindyewu witabuujà. Ikàlè ne diitabuujà kùdi Nzambì.

Bu nwènù ànu mwà kujingulula Bwikadi bwà Mukalenge's wè!

<sup>102</sup> Mpindyewu inábànzà udi mwimàne apa ewu, bwà wamònakù mwà. . . Mèmè ncyèna mukumanyè to, ku dyànyì dimanya. Wèwè kwèna mummanyè to, ne mèmè ncyèna mukumanyè to. Ncyà bushùwà anyi? Èyo. Nànkù udi muntu udi kàyi mummanyè to, ne mèmè ncyèna mumumanyè to. Ne ncivwa mumanyè inábànzà mukwàbò awu to. Kàdi ewu inábànzà mmwenyi ànu wetù wa menemene ewu, ku dyànyì dimanya. Ní ncyà bushùwà, elà cyanza cyèbè muulu, inábànzà. Musangu wètù wà nzànzànzà, wà ditwilangana kacya bààtùlela.

<sup>103</sup> Ki muntu mukàjì ne muntu mulùme mbòbò aba. Cimfwànyì ànu cilenga cyà Yone Munsantu 4, mwàkatwilanganà muntu mukàjì ne Muntu mulùme; ne muntu mukàjì awu ùvwa mwena Sàmaalèyà, Yesù ùvwa mwena Yudà. Ki kubangabò kuyiikilangana, ne Yesù kusokololaYè maalu masokòmè a mu mwoyi wà mukàjì awu ne kumumanyisha mwaba wùvwà lutàtù lwèndè. Mpindyewu, Yèyè mwikàle Yesù umwèumwè awu leelù ewu, Udi mwà kwenza cyenzi cimwècimwè aci leelù.

<sup>104</sup> Bu mukàjì ewu mwà kwela cyanza cyèndè muulu kùdì Nzambì, kabìyi bwà kudìcipa to (bwalu, katwèna twitabuuja mu dicyènza nànsha), ànu kwela cyanza muulu cyanààna bwà meeji matòòke, pàmwè ne cyànyì ne, katùtukù banjì kumòngana kacya kwonsò eku to, ne katwèna bamanyè kantu nànsha kàmwè bwà muntu ne mukwèndè to. Udikù mwà kwela cyanza cyèbè muulu anyi, inábànzà? Ki bwalu mbwòbù abu's. Yèyè kàtukù mwanjì kummòna to, anyi mèmè ncitukù mwanjì kumumòna to, ne yèyè mmwenyi ànu wa menemene kùndì. Mpindyewu kwòkò kwikàle. . .

<sup>105</sup> Bwikadi bwà Mukalenge Yesù bùdi kaaba aka. Mukàjì ewu yèyè ùsaama, ncyèna mufwànyine kumwondopa to. Ukaadi mumanè kwondòpiibwa; Kilistò wàkamwondopa pààkamufwilàYe apu. Nudi nwitabuuja nànkù anyi? Kàdi bu ne Yèyè ùvwa mwimàne kaaba aka mpindyewu, mwikàle ne. . . mu mwaba wùndì mwimàne ewu, nènku Yèyè's ùvwa mufwànyine, ùvwa mwà kumubuulwila, anyi kwenza cintu kampànda bwà kubàndisha diitabuuja dyèndè bwà kukùmbanganadì! Mpindyewu, yèyè mmufwànyine kwikala mwimàne kaaba aka bwà lutàtù lwà mfrangà. Mmufwànyine kwikala mwimàne kaaba aka bwà lutàtù lwà ku lubànzà. Mmufwànyine kwikala mwimàne kaaba aka, mwikàle wàmba kufwà ne kànsèrè. Mmufwànyine kwikala mwimàne kaaba aka mwikàle ne disaamà dyà cyàdi. Ncyèna mumanyè to. Mèmè ncyèna mwà kunwàmbila to.

<sup>106</sup> Kàdi mpindyewu bu wèwè mwà kuswà bwà kuditèeka pa kaaba kàànyì, kulwa apa ne kwangata kaaba kàànyì, dyùmvwè ànu mudilekèlèlè's. [Mwanèètù Branham wàshàadi

mupùwe—Muf.] Cyà bushùwà's. Nànsha mémè ncyèna mumanyè to, anyi ncyèna mufwànyine kumanya to. Kàdi Nzambì wa mu Dyulu mmumanyè. Nudikù mwà kuumvwa mpindyewu anyi?

<sup>107</sup> Kàdi bu Kilistò mwà kwenza cintu cimwècimwè aci mwab'ewu, Bulelèlà bùdì kabùyì bùpangila abu, mùshindù wùdìYe mubiishiiibwe ku bafwè ewu, ne mujaadike ne Yèyè ùdi Yesù umwèumwè uvwa wakula ne mukàjì wa ku ciinà cyà màyi awu, mbanganyi mwab'ewu bàdi bamba ne: “NèmMwakidilè mpindyewu mene bu Mwendopi wanyi, anyi cyònsò cìndiku naaci dijinga aci”? Elà cianza muulu, wámbe ne: “Mémè nèmMwakidilè bu Yèyè mwà kwenza nànkù.”

<sup>108</sup> Mukàjì udi ne byanza byela muulu wàwa, kacya katùtukù banjì kutuutakeena to. Mukalenge énzèku nànkù, ki disambila dyànyì. Mpindyewu inàbànzà awu ùdi ùmwèka bu udi wenda umuka kùndi; bu batèeleji mwà kubàkulakù dīyì dyànyì. Ndi mmòna muntu kampànda mwimàne kuulu. Mukàjì awu kī mbwèndè yèyè mwinè to, nangàngà. Ùdi ùsambidila muntu mukwàbò kampànda, ne mwinè awu ny'inàbànzà mushindàme. Mmamwèndè, udiyè ùsambidila awu. Aci ncilelèlà. Ùdi ne túsamàsaamà twà mwoyi, dituuta dikesè dyà mwoyi, bu nànkù. Kèna ùkòokesha kulààla bufùkù to. Kī mmwòmò anyi? Elà cianza cyèbè muulu pìikalàci cilelèlà. Ne inàbànzà awu kī ngwa mu ditùnga emu to. Inàbànzà awu ngwa kule ne muneemu. Inàbànzà awu ngwa ku Géorgie. Ncyà bushùwà menemene. Ne wèwè udi wa ku Géorgie. Ne udi kàbìdì ukèba disambila bwà dīsù dyèbè. Udi wenda ushààla mpofo mu mèsù èbè amu. Ne aci ncilelèlà. Udi witabuuja ne Nzambì neàkusàngàjè anyi? Pìikalàci cilelèlà, elà cianza muulu. Èyo.

<sup>109</sup> Mpindyewu nudi nwitabuuja anyi? Mpindyewu ikàlaayi ne diitabuuja kùdì Nzambì. Pàndì mmusambidila yèyè apa, disambidilè wèwè mwinè mwaba awu, ne itàbùùjà Nzambì. Yèyè ùdi kaaba aka, mwikàle myaba yònsò.

Lwàku apa, mwanèètù wa bakàjì.

<sup>110</sup> Musùngidi mubènèshiiibwe, ndi ndòmba, mu Dìna dyà Kilistò, bwà Wènzèléku mukàjì ewu dijinga dyèndè. Swàku bwà Bukolè bwà Nzambì wa Bukolè bwònsò bwìkalè pambidi pèndè, ne swàku bwà yèyè òndopiibwè ne àpetè cidiye mulòmbe aci. Ndi ndòmba dibènesha edi mu Dìna dyà Yesù. Amen.

<sup>111</sup> Mpindyewu ndààku, wenda ucyònkómoka, ne disànka. Nènku itàbùùjà, mwanèètù wa bakàjì, ùsangalè. Èyo.

<sup>112</sup> Ncyèna mutwishiiibwe to, kàdi ndi ngeela meeji ne ndi mumanyè mukàjì ewu. Ngeela meeji ne wèwè ewu udi wa ku Georgetown, bwalu mémè ndi. . . Wèwè ewu kwèna cilongo cyà Mwanèètù Arganbright anyi? Mu bushùwà bwà bwalu, mpindyewu edi dilaabiibwa, ndishiilàngàne. Udi umvwa ne kùdì dishiilàngana mpindyewu mene. Pàndì nyiikila neebè mwaba kampànda mukwàbò; byàshiiidyanganyi patùdì twakulangana

apa. Umvù mùshindù mulenga menemene, bu nàнку. N’Nyumà Mwimpè. Kwèna kaaba aka bwèbe wèwè mwinè to. Udi kaaba aka bwà muntu mukwàbò, mbwà mwànà mukesè wa bakàjì wa bidimu bu binaayi anyi bitaanu nàнку awu. Ùdi ne disaamà dyà twonyi, ne mmusòmbèle mu Indiana wa ku nord. Aci ncilelèlè. Cyùdi naaci mu cianza aci, mutùminèci, ne yèyè neàsangalè. Itàbùùjà ne mwoyi wèbè wònsò mpindyewu, ne petà cyùdi mulòmbè aci, mu Dìna dyà Kilistò.

“Bu wèwè mwà kwitabuuja, bintu byònsò bìdi mwà kwenzeka!”

<sup>113</sup> Inàbànza nyèyè ewu udi mwenyi kùndi. Ncyèna mukumanyè to, ncitu mwanjì kukumònakù to kacya bàndela. Tudi beenyi muntu kùdi mukwèndè, bashiilàngàne ku bidimu byàbùngi; pàmwàpa byàbùngi, balediibwe mu ntàntà wa kilòmèètà yàbùngi. Ncyèna mukumanyè to, kacya ncitu mwanjì kukumònakù to. Kàdi Yesù Kilistò ngudi mukumanyè.

<sup>114</sup> Cintu kampànda ncyenzèke mu batèeleji emu; muntu mulùme wàmweneki pabwìpi naanyi apa. Nyèyè ewu musòmbè, apa mene, ne kààmunda kàa mu mùfù. Udi witabuuja anyi, mukalenge? [Mwanèètù wa balùme awu ùdi wàmba ne: “Èyowà.”—Muf.] Nàнку Kilistò ùdi ùkwondopa ne ùkusàngaja! Amen.

<sup>115</sup> Ki mùshindù wà kucyènza ngwòwò awu, kwitabuuja! Cyàlengìye ncinyi? Ncìtukù mwanjì kumòna muntu awu to; kàdi mmwondòpiibwe ànu mwaba awu mene. Mmulengè Mukalenge Yesù Udi kaaba aka awu. Umùshaayi bupidyà abu mu nwènu! Pwàyì mwoyi ne mèmè ndi William Branham. Tàngilàayi Yesù Kilistò, Yèyè Ngudi kaaba aka. Ndi ngeela diitabuuja dyènu kadyòmbò, mu Dìna dyà Kilistò, bwà nùmpwè mèmè mwoyi; ne nwitabuujè ne Mukalenge Yesù ngudi kaaba aka ewu, ne nùmonè cìikalà mwà kwenzeka aci. Mwaba wùdi usanganyiibwa mu citanda emu nànsha mwikàle penyì.

<sup>116</sup> Mpindyewu mukàjì mukesè nyèyè ewu. Kacya ncìtukù mwanjì kumumòna to. Mmukùlumpè kùndi. Yèyè, ncyèna mumanyè ne nganyi to, anyi kùdiye mufùme, anyi cintu nànsha cimwè cidì cimutàngila. Mèmè ndi mwenyi ànu wa menemene kùdiye. Kàdi Kilistò mmumumanyè.

<sup>117</sup> Bu Yèyè mwà kunsokolwela cyùdi muvwilè kaaba aka, neucyàkidilè ne ùcitàbùùjè anyi? [Mwanèètù wa bakàjì awu ùdi wàmba ne: “Bushùwà’s.”—Muf.] Wèwè’s umvù cintu cyà pabwàcì katanci aka, pànggàmbì cintu kampànda apa, kí mmwòmò anyi? Ùvwa mmwanèènù wa bakàjì udi mu lupitaadi lwà babùlùke mu Madison, mu Indiana awu. Aci mmwòmò. Bwalu, mukàjì mukwàbò ùvwa mwimàne kaaba aka, ne wèwè uvwa mwimàne mwab’awu mwikàle mutàngile lwà kùneeku. Nènku cikèènà-kumòna aci, wèwè uvwa mwtàbùùjè pawàfikì mwab’ewu apu. Ncyà bushùwà menemene. Ki cyàcyènji. Ne cyùdi muvwilè

kaaba aka dilòlò edi, mbwalu udi ne disaamà dyà mwoyi. Uvwa mufùme ku dipeta disaamà dyà mwoyi. Ncyà bushùwà menemene. Ne ndi mmòna mpindyewu, pàndì ntàngila mu cikèèná-kumòna apa ne, buloba bùdi bùyungulukà abu. Udi wa mu mwaba kampànda mu Indiana wa ku sud emu. Udi wa pabwìpì ne Corydon, udi wa mwómò amu. Àlùkìlaaku kwèbè kumbèlu, wasàngadi. Yesù Kilistò ùdi ùkusàngaja. Aci ng'EMU MMÛDÌ NYUMÀ MWÌMPÈ WÀMBA.

<sup>118</sup> Ikàlà ne diitabuuja, ne itàbùùjà. Kwèdi mpatà to. Itàbùùjà ànu cyanààná. Nudikù mwà kujingulula diikalakù dyà myaba yònsò dyà Mukalenge Yesù anyi? Bilenga be! Mbwalu kaayi abu?

<sup>119</sup> Lwà mu ditumba emu, ndi mmòna cikèèná-kumòna. Ngàngàbukà kì mmumanyè ne nkànsèrè anyi ndisaamà dyà cyàdì to. Ncyà bushùwà. Kàdi bu wèwè mwà kuciitabuuja, wondòpiibù, nànsha bìshi. Diitabuuja dyèbè dyàkusungidi. Ndàaku.

<sup>120</sup> Ki bwalu mbwòbù abu's. Diikalakù dyà myaba yònsò dyà Nzambì udi ne mwoyi! Ndi ngeela diitabuuja dyèbè kadyòmbò. “Bu wèwè mwà kwitabuuja!” Mpindyewu, mMubiike ku bafwè. Ùdi neetù kaaba aka. N'Yèyè awu! Ki bintu mene byàkènzàYe pàvwàYe pànu pa buloba mbyòbì abi. Bidimu binunu bìbìdì bikaadi bipìte, Yèyè ùcidi ànu ne mwoyi, ne Ùdi ne mwoyi kashidi ne kashidi. Itàbùùjà ànu cyanààná, ikàlà ne diitabuuja.

<sup>121</sup> Mémè ncyèna mukumanyè to, inàbànzà. Ncìtukù mwanjì kukumòna to kacya bàndela, ncyèna mumanyè kantu nànsha kàmwè pa bìdì bikutàngila to. Aci ncilelèlà, kì mmwómò anyi? Yesù Kilistò mmukumanyè. Bu Nzambì mwà kunsokolwela cyùdì muvwilè kaaba aka, nèuMwitàbuujè, ne neungiitabùùjè mémè bu mupròfetà Wendè anyi? Bu Yèyè mwà kwenza aci, s'udi umanya ne Cintu kampànda ncidì cindaabè. Bivwa bikèngela bwà wèwè kwikala mumanyè ne n'Cyòcì aci. Mpindyewu mémè mwambè ne: “Nènkutentèkèlè byanza, bwà wòndopiibwè,” udi mufwànyine kwikala ne bukenji bwà kwela aci mpatà. Kàdi Nzambì mungambile cintu kampànda cyùdì wèwè mumanyè ne mbulelèlà, díbà adi's udi umanya ne mbulelèlà anyi kì mbwòbù. Ncyà bushùwà anyi? [Mwanèètù wa bakàjì awu ùdi wàmba ne: “Aci ncyà bushùwà.”—Muf.] Ndutàtù lwà mu njila wa bakàjì. Mbakupandè, ndi nkumòna ufùmina ku mèèsà a dipandilangana, ne cintu kampànda citòòke pa mpàlà pèèbè, kàdi kabyàkakùmbanakù to. Ncyà bushùwà. Kàdi, démon awu uvwa musokòme ngàngàbukà, kàdi kèna mwà kusokoma Nzambì to. Alùkìlà mwèbè, usangalè, inàbànzà, Yesù Kilistò wàkwondòpù ne wàkusàngaji.

Bu wèwè mwà kwitabuuja!

<sup>122</sup> Ndi mwenyi kùdì, inàbànzà. Udi witabuuja ne Yesù Kilistò, Mwàná wa Nzambì, ùdi kaaba aka anyi? Udi witabuuja ne neÀkusàngajè anyi? Disaamà dyà nsukaadi kadyèna cintu to,

bwà Nzambi kwondopa Yè. Udi witabuuja ne Yéyè neàkusàngàjè anyi? Nànkù alùkilaaku mwèbè ùpetè dyondopiibwa dyèbè, mu Dìnà dyà Yesù Kilistò, Mwànà wa Nzambi. Amen.

Lwàku apa, inǎbǎnzà. Udi witabuuja anyi?

123 Mpindyewu lekèlaayi kwela meeji awu paanyimà apu! Kí “ndubùkù” to. Mpindyewu kanwèna mwà kukupànduka to! Imànàayi nnùleejè.

124 Ncyèna mumanyè mukàji ewu to. Tentèkà byanza byèbè pa byànyì apa, inǎbǎnzà. Bu Nzambi mwà kunsokolwela lutàtù lwèbè! Pàndì ntàngila mu *nùnkù*, udi mumanyè ne ncyèna mbala meeji èbè to. Bu Nzambi mwà kunsokolwela lutàtù lwèbè, newitabuuje ne Yesù Kilistò m’Mwànà wa Nzambi, ne mèmè ndi musadidi Wendè anyi? Bu wèwè mwà kwitabuuja, elà cyana muulu. Udi ne disaamà dyà bǎnà bakàji, disaamà dyà bainǎbǎnzà. Ncyà bushùwà. Uvwa naadi bushùwà; kwèna naadi mpindyewu to. Wondopiibù. Kwàta njila ndàaku, cyònkómokà ne ikàlà ne disànka.

125 Lwàku, mukalenge. Disaamà dyà kale dyà twonyi adi, ne cintu kampànda ciikàle cikutàcisha. Udi witabuuja ne Nzambi neàkusàngàjè anyi? [Mwanèètù wa balùme awu ùdi wamba ne: “Èyowà.”—Muf.] Ùkwondòpacì anyi? Nànkù, mu Dìnà dyà Yesù Kilistò, akidilà dyondopiibwa dyèbè, ne kwàta njila ndàaku, wenda ucyònkómoka. Amen. Nzambi àkubènèshè, mwanèètù wa balùme.

Itàbùùjà!

126 Wetwàwu, inǎbǎnzà! Kwènàku mwà kunanga bwà kuya, kudya cyàkàbìdi cyàkudya cìmpè mùvwà ne ciibidilu cyà kudya amu anyi? Wèwè uvwa mubìndùlùke bikolè, kí mmwòmò anyi? Ncìjuulè cyùjà cyà mu cìfù mu cìfù cyèbè amu. Ndàaku, wàngatè dyàmpà dyela minyìnyì ùdìdyè, Yesù Kilistò wàkusàngaji. Kwàta njila ndàaku, wenda ucyònkómoka.

127 “Bu wèwè mwà kwitabuuja!” Ikàlaayi ne diitabuuja kùdi Nzambi. Nudi nwitabuuja anyi? Kilistò udi ne mwoyi, wa bukolè bwònsò awu udi kaaba aka mpindyewu, bwà kwondopa muntu yònsò mwab’ewu.

128 Anjì indilaayi. Mu ndekeelu mwàmwa kwìnshì kwà mulongo, musòmbe lwà apa mene, mpassòmbe nsongàalùmè kampànda. Diitabuuja dyèbè ndinène kutàmba mùvwà wèwè wela meeji amu, mwanàanyi wa balùme. Ùvwa ne disaamà dyà mwoyi, kí mmwòmò anyi? Aci nì ncyà bushùwà, juukilà kuulu. Yesù Kilistò wàkwondòpù, mwanàanyi wa balùme. Wasàngadi. Kwàta njila ndàaku, wòndopiibwè.

129 Nudi baMwitàbùùje anyi? Ikàlaayi ne diitabuuja kùdi Nzambi.

130 Muntu mulùme nyèyè ewu ùndì nciyi mumanyè to. Katwèna bamanyàngàne to. Ngeela meeji ne muntu ewu mmubàtìijibwe

mu dinda emu. Kàdi ncyéna mukumanyè to, ncyénàku ne cingènyingenyi nànsha cikesè bwèbè wèwè to. Ncyà bushùwà anyi? Bu Yesù Kilistò mwà kunsokolwela cyùdi muvwilè kaaba aka, neucitabè anyi?

<sup>131</sup> Mbanganyi mu batèeleji emu biikalà mwà kucyàkidila mpindyewu mene? “Bu wèwè mwà kwitabuuja!” Ikàlaayi ànu ne diitabuuja. Kanwèdi mpatà to.

<sup>132</sup> Muntu mulùme awu udi ne disaamà dyà dikòba. Ncyà bushùwà. Ne ndi mmòna ne udi munkaci mwà. . . Ndisaamà dyà mpàci wa mènyi, kàbidi. Ncyà bushùwà. Ní ncyòci, nyungishàbi cyanza cyèbè. Ne ndi mmòna cintu kampànda cifiike ciimàne pankàci pèèbè ne mukàji kampànda; mmukàjèèbè. Yèyè ngùdi usambidila awu. Yèyè ùdi ngènzàmpèkààtù, ne wèwè udi ujinga bwà àlwe mwena Kilistò. Aci ng’EMU MMÜDÌ MUKALENGE WÀMBA. Ncyà bushùwà. Ndàaku, ùkamutentèkèlè byanza, ùmusambidilè, bwà Nzambì mu Dyulu àsokololè mushinga wà bintu bìdi bilelèlè ebi.

<sup>133</sup> Udi witabuuja anyi? Udi witabuuja ne Nzambì neàcyènzè anyi? “Bu wèwè mwà kwitabuuja!” Ndi ngeela diitabuuja dycèbè kadyòmò. Lwà paanyimà mu ndekeelu mwàmwa, mwaba wònsò wùdi awu, tàngilà ne ikàlà ne mwoyi! Ikàlà ne diitabuuja kùdi Nzambì, mwaba wònsò wùdi awu. “Bu wèwè mwà kwitabuuja, bintu byònsò bìdi mwà kwenzeka.” Bu wèwè mwà kwitabuuja! Tàngilàayi, tàngilàayi mu nunku, sambilàayi.

Wèwè udi wamba ne: “Cyùdi utàngila ncinyi, Mwanèètù Branham?”

<sup>134</sup> Rebekah, alùkidilàku lwà eku nùku ndambù, munanga wanyi. Imàna ànu mwaba wùdi awu. Ki mwanàanyi wa bakàji wàwa, wìkala pèndè dīngà ditùku mupròfetà mukàji. Inàbànzà udi mwimàne mwab’awu pabwìpì neebè menemene apu awu, munanga wanyi, mwasè cifulu citòòke, ùdi ùsaama mutù wà kapàla. Ela cyanza muulu, anyi juukilà kuulu, inàbànzà. Udi usambila bwà Nzambì àbiikilè, ènzè bwà nkubiikilè. Mmwòmò anyi? Mwanàanyi mukèsè wa bakàji awu àkutentèkèlè byanza mwab’awu.

Éyi Nzambì wa Cyendèlèlè, mu Dìna dyà Yesù Kilistò, ndi ntàndisha démon udi utàcisha mukàji wàwa awu. Nèku ùmushiibwè, mu Dìna dyà Kilistò. Amen.

<sup>135</sup> Kaa, Dìna dyà Mukalenge dibeneshiibwè’s wè! Kàbidi, Mukalenge Yesù àDibuulùlèku. Nudi nwitabuuja ne Yèyè ùdi kaaba aka anyi? Nànu lekèlaayi nnwàmbilèku, muntu ne muntu wa kunùdi, mpindyewu mene, bu nwènù mwà kucitabuuja ne, Yesù Kilistò ùdi ùsàngaja muntu ne muntu wa kunùdi, mpindyewu mene. Pìikalàbi ne mèyi àanyi mmaledlèlè *apa*, mmaledlèlè *kwàka*. Nwènù benzè cìndi nnwàmbila bwà kwenza aci, nudi mwà kwondopiibwa mpindyewu mene. Nudi nuciitabuuja anyi? Nànu tentèkèlàngànaayi byanza muntu ne



mukwèndè. Tentèkèlàngànaayi ànu byanza muntu ne mukwèndè cyanààna, munda emu anyi pambèlu. Kanwèdikù mpatà to! Ngǔmvù nyumà wa bumpudimaci ùmuka. S'ki Yèyè ewu, Kilstò mubiike ku lufù awu!

<sup>136</sup> Éyi Nzambì wa Cyendèlèlè ne Mubènèshiiibwe, mu Dîna dyà Mukalenge Yesù, ndi ngeela nyumà yònsò wa bukooyà kadyòmbò, mu Dîna dyà Kilstò Mukalenge, bwà kuumukayè mu mwaba ewu, àpatukè munda mwà bantu aba. Ne swàku mpindyewu bwà Nyumà Mwîmpè munène awu àbatiizè muntu ne muntu mu mwaba ewu, ne diitabuuja dinène bwà kwitabuuja.

<sup>137</sup> Kaa, Sàtaanà, wèwè démon, udi mutwènzè mikaaka ntàntà mule byàkùmbànyi. Kilstò mmubiishiiibwe ku lufù, mMwimàne mwab'ewu ne nsapi yà lufù ne yà ifernò miMulembèlèlè. Bukolè bwà dyondopa mbufucidila. Nènku tudi tukutùmina díyi, mu Dîna dyà Yesù Kilstò, Mwànà udi ne mwoyi wa Nzambì, bwà wèwè kuumuka mu bantu aba. Pàtukà munda mwàbò, Sàtaanà, bwà bàye ne bøndopiibwè.

<sup>138</sup> Wèwè mwiitabùùje ne mwoyi wèbè wònsò ne, Yesù Kilstò wàkwondòpù, juukila kuulu, wítabè Bukolè bwà dyondopa dyà kùdi Nzambì wa Bukolè bwònsò. Ki cyôci aci! Mukalenge àtumbè! Mukalenge àbeneshiiibwè! Nwènù, muntu ne muntu, nwondòpiibù. Juukilaayi kuulu, nùpe Nzambì butùmbi! Amen! Dîna dyà Mukalenge dìbeneshiiibwè's wè! TùMupààyi butùmbi, patùdi twela byanza muulu ne tùMusaamùna apa. Bèneshàayi Mwànà wa Nzambì udi ne mwoyi! Amen!



*NÈNKU MÈSÙ ÀBÒ ÀKATÀBALA NÈ BÀÀKAMUJINGULULA* LUA57-0421E  
(And Their Eyes Were Opened And They Knew Him)

DILONDANGANA DYÀ MALONGESHA PA DITÀBULUJA DYÀ PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dilòlò dyà dyàlumingu dyà Paasàkà, mu matùkù 21 a ngondo mwinâyì, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)